

Aalisarneq pillugu Inatsisartut Inatsisaat allanngorteqqullugu imaalillugu Kalaallit Nunaata kitaani raajanut TAC-ip agguanneqarnerani sinerissap qanittuani aalisartunut avataasiortunullu assigiimmik 50/50-ngortillugu suliareqqullugu Naalakkersuisut peqquneqarnissaannik Inatsisartut aalajangiiffigisassatut siunnersuut.
(Inatsisartunut ilaasortaq Nikolaj Jeremiassen, Siumut)

Akissuteqaat

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Inatsisartunut ilaasortap hr. Nikolaj Jeremiassenip, Siumut taamatut siunnersuuteqarsimaneranik qujaffigaara.

Pinngortitaleriffik ilisimatitsivoq raajaqassuseq eqqarsaatigalugu aalisariutit immikkoortuisa sorliit pisassiissutinik atuinerat annerusumik pingaaruteqanngitsoq. Raajaqassutsimik naliliinermi sumi aalisartoqarnerunera pingaaruteqarpoq. Pinngortitaleriffiup ilimagaa, sinerissap qanittuani avataasiornermilu aalisariutit agguarnerat 50/50-imut allanngortinnejarpal Qeqertarsuup Tunuani aalisarneq annertusissasoq. Pinngortitaleriffiullu tassunga peqatigitillugu ilisimatitsissutigaa Qeqertarsuup Tunuanipisaasinnaasunik atuineq procentinngorlugu 30 %-it ataakkaat.

Uppernarsarsinnaavara avataasiirluni aalisarnermi pisassiissutit ilaat aalisariutit immikkoortuanni tassani aalisariutaatileqatigiiffiit tamakkerlugit pisarinikuunngikkaat. Avataasiirluni aalisarnermi aalisariutaatileqatigiiffiit tassunga taarsiullugu aalisarneq pillugu inatsimmi § 19, imm. 7 naapertorlugu avataasiirluni aalisartunut pisassiissutit ilaat sinerissap qanittuanut nuunneqarnissaannik qinnuteqaateqartarnikuupput.

Kalaallit Nunaanni Aalisarsinnaanermut Nakkutilliivimmit paasissutissani takuneqarsinnaavoq pisassiissutissanik avataasiirluni aalisarnermit sinerissap qanittuanut nuussisinnaanermut periarfissaq, ukiakkut 2008-mi nuussisoqarsinnaalernerata kingorna, avataasiirluni aalisarnermi aalisariutaatileqatigiiffiit atorneqarnikuusoq. Piffissami 2008-miit 2015-imut ukiumut agguaqatigiissillugu 7.321 tonsit nuunneqartarnikuupput. Nuunneqartut annertussusiannik procentillugu naatsorsuinermi takuneqarsinnaavoq piffissami 2008-mit 2015-imut raajarniarnermi agguarneqarneqavinnerat tassaanikuusoq avataasiirluni aalisariutinut 49,57 %-it sinerissallu qanittuani aalisariutinut 50,43 %-it.

Aalisariutaatileqatigiiffiit tunisassiorfinnik kiisalu sinerissap qanittuani aalisariutinik pigisaqartut nuussisarput, taamaalilluni raajanik pisassiissutit avataasiirluni raajarniarnermi namminneq aalisariutiminniit sinerissap qanittuani raajarniarnermi namminneq aalisariutiminntu nuussillutik. Naliliinermi tamassumunnga pissutaasorineqarpoq raajat nunami tunisassiorfinnut tunisat akitsuiteqanninnerat, tassungalu peqatigitillugu raajat uutat qalipajakkat akiisa maannakkut qaffasinnerat. Taamaammat avataasiortunik sinerissallu qanittuani aalisariutaateqarnissaq kiisalu imminntu tulaassinnaasaminntu tunisassiorfeqarnissaq taakkununnga imminut akilersinnaasimasoq naatsorsuutigineqarpoq, taamaalillutillu akitsuutit sipaarutigisinnaallugit kiisalu kilisaatini avataasiortuni akissat qaffassisusiat appartissinnaallugu.

Aalajangiiffigisassatut siunnersuutip taamatut isikkoqartillugu Naalakkersuisut isumaqataallutik inassuteqaateqarsinnaannginnerat pillugu pissutsit marluk Naalakkersuisut oqaatigissavaat:

Siullermik, 2016-imi pisassiissutit avataasiorlutik aalisartunut 57 %-imik sinerissallu qanittuani aalisartunut 43 %-imik agguanneqarnissaat naatsorsuutigigaanni aalisariutillu tunisassiorsinnaanermut akuersissutitik atorlugit imminnut pisassiissutigineqartut tunisassiarippatigit nunamilu tunisassiorfinnut tulaanneqartussaatitaasut tulaanneqarpata, taava 50/50-imik agguassinerup allanngortinneqarnera inuiaqtigigiinnut tamakkiisumik sunniutai imaassasut naatsorsuutigineqassaaq:

Aningaasaqarnermut Naalakkersuisoqarfiup naatsorsuinera malillugu avammut tunisinermi isertitat 32 mio. kr.-nik apparnissaat naatsorsuutigineqarpoq, kommuninut aamma Nunap Karsianut akileraarutit A-t 5,5 mio. kr.-nik apparnissaat naatsorsuutigineqarpoq, raajanut akitsuutit 15 mio. kr.-nik apparnissaat naatsorsuutigineqarpoq kiisalu ukioq naallugu suliffiusut sisamat annaassagaat naatsorsuutigineqarluni.

Erseqqissaatigineqassaaq qulaani taaneqartutut tamanna nuussisarneq ullumikkut pisareermat.

Aappa Naalakkersuisut oqaatigerusutaat tassaavoq, allannguutit taamatut isikkoqartillugit atuutilersinneqassappata avataasiorluni aalisarnermi aalisariutaatileqatigiiiftit Namminersorlutik Oqartussat eqqartuussivimmut tunniussisinnaanerat piviusumik pisinnaavoq. Tassani pisassiissutinit pigisanut pisinnaatitaaffiusut tunngavigineqarput. Eqqartuussivimmi suliaq taamaattoq qanoq inerneqassanersoq Namminersorlutillu Oqartussanut aningaasatigut qanoq kinguneqassanersoq siumut oqaatigiuminaappoq. Eqqartuussivimmi suliaq ajorsassutigineqassappat Aningaasanut inatsimmi malunnaateqartunik kinguneqarsinnaavoq.

Taamaammat annertunerusunik nalilersuisoqarsimatinngagu kingunerisassanillu naatsorsuisoqartinnagu inuiaqtigiiit aningaasaqarnerat eqqarsaatigalugu agguassisarnermi tunngaviusup allanngortinneqarnissaai inassuteqaatigineqarsinnaanngilaq.

Taamaammat aalajangiiffigisassatut siunnersuutip akuerineqarnissaai Naalakkersuisut inassuteqaatigisinnaanngilaat, Naalakkersuisulli aalajangiiffigisassatut siunnersuut aalisarneq pillugu Inatsisartut inatsisaanni nr. 18, 31. oktober 1996-imeersumi § 14-ip atorneqarsinnaaneranik – taassumalu atorneqarnerani aningaasatigut kingunissaanik – maannakkut misissuinermut ilanngutissavaat.

Naggasiullugu oqaatigineqassaaq ullumikkut avitsisarneq aalisarnermi kattuffiit isumaqatigiissuteqarsimaneranit tunngaveqarmat. Siunnersuut una pillugu tusarniaanermi erseroq kattuffiup aappaata taanna isumaqatigiissut ullumikkut isumaqataaffigiuunnaarsimagaai.

Taamatut oqaaseqarlunga alajangiiffigisassatut siunnersuut Inatsisartunut oqaluuserisassanngortippa.